

Premià – il curaschi da dar il pled als giuvenns

Onur per la Televisiun Rumantscha

■ **(anr/vi) Susanna Fanzun ha retschavì il glindesdi a Turitg il premi per schurnalists da l'Agid svizzer encunter Sida. La schurnalista rumantscha ha fatg ensemen cun ses team in film curaschus davart «giuventetgna e sexualitad».** Ils schurnalists han per disa d'adina interrogar experts. Gist quai n'han *Susanna Fanzun* e ses team da la Televisiun Rumantscha betg fatg en lur film. Els han laschè d'ina vart tut ils cussegladers da sexualitad, ils psicologs ed ils terapeuts. Empè dals «experts» han ils pertutgads sez discurre: 23 giuvenns e giuvnas han raquintà da lur experientschas e ditg, co ch'igl è – e betg co ch'ils experts avessan gugent ch'i fiss.

Quai saja stà in pass fitg curaschus dal team da la Televisiun Rumantscha, ha ditg *Michel Danthe*, il schefredactor da «Le Matin». El è stà il pledader da la giuria ed ha tegnì la laudatio a chaschun da la surdada dal premi a Turitg.

Sex cumenza savens cun l'alcohol

L'emprim mument hajan ins forsa il sentiment ch'ins haja gia vesì savens talas contribuziuns davart giuventetgna e sexualitad, ha *Danthe* remartgà. Ma quai cugliunia. Il film cumenzia cun drogas ed alcohol. Quai saja bun, pertge che gist ils meds narcotics stettian savens a l'entschatta d'in flirt u d'ina experientscha sexuala. Ils giuvenils raquintian quai senza dramatisar ed a moda pragmatica.

E tge ha sclerì si ils giuvenils? Era qua

porschia il film in maletg realistic, di *Danthe*. I n'è betg ils geniturs, la scola u il plevon che explitgeschan als giuvenils la chaussa, mabain ils fragliuns, las collegas, ils collegs. Quai saja fitg impurtant per la strategia da questa emissiun.

Sida «en passant»

E tge ha quai insumma da far cun Sida? Pertge obtegna quest film il premi per schurnalists da l'Agid svizzer cunter Sida? «Condoms gidan era cunter Sida», remartga in giuven cura ch'i va per la prevenziun. «Per ina notg na ristg jau betg mia vita», di in auter. Questas remartgas, fatgas mo uschè «en passant», ditgian il pli essenzial cun simpels plects ed en la lingua dals giuvenns.

Plinavant mussia il film che tests da HIV na sajan nagut extraordinari pli tar questa generaziun. Uschia di ina giuvna: «Cun 16/17 hai jau fatg in test da HIV per esser segira ch'jau n'haja betg Sida e mes ami er betg.» In giuven declera ch'el vulevia esser segir dad esser «net». I fiss brutal d'avair Sida e da betg savair quai. Ins pudess infectar insatgi ch'ins ha gugent, l'amia u l'ami. I fiss sgarschavel, sch'i capitass insatge uschia.

Il film di tut

«23 giuvenns e giuvnas grischunas s'expriman tar la tematica. Els fan quai cun lur umor caracteristic, en lur atgna lingua, en lur moda e maniera, ord lur optica, mintgatant cun statements brutals e cun ina forza persvasiva fitg speziala.»



Il team ha tschaffan dal premi: **Mirco Manetsch** (clips e tagl), **Peter Kreiliger** (intervistas), **Susanna Fanzun** e **Margarethe Sauter** (camera).

FOTO C. CADRUVI

Il film cuntogna tut ils messadis necessaris pertutgand Sida, prevenziun, preservativs, tests da Sida u co ch'i saja da dir «na» tar drogas u violenza sexuala.

La giuria ha perquai ludà la subtilitad e l'autentizitad dal film. Il punct il pli essenzial saja dentant la strategia da laschar discurren en il film be la giuventetgna davart la sexualitad. Uschia cuntanschia questa contribuziun gist la dretga gruppaziun dal public, numnadain puspè

la giuventetgna. Quai haja persvadì la giuria.

Indesch lavurs en concorrenza

La surdada dal premi ha gì lieu en il Zunfthaus zur Meise en in'atmosfera festiva. Igl è vegnì mussà ina pitschna sequenza dal film che cuntogna era clips cun da tuttas guisas da condoms.

Quest onn ha l'Agid svizzer cunter Sida surdà per la segunda giada il premi per

schurnalists. Sco *Thomas Lyssy*, il pledader da pressa, ha ditg a l'anr èn vegnidas inoltradas indesch lavurs da buna qualitad. L'onn passà ha *Patrick Rohr*, il schurnalista da «Quer», obtegnì il premi per ina emissiun davart Sida en la vegliadetgna.

Il film «giuventetgna e sexualitad» chattan ins sin la pagina d'internet da www.rtr.ch u sin la pagina www.aids.ch.